


CELEBRACIÓN EN OS COTOS

22-23 de agosto do 2026

XXI SEMANA DO TEMPO ORDINARIO A



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,

E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *Que ledos hoxe estamos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

A todos nós gústanos presumir de que temos amigos importantes e tratamos con eles. Pero moitas veces simplemente son coñecidos, non temos a intimidade necesaria para dicir que son verdadeiros amigos.

Xesús hoxe pregúntalle aos discípulos e a nós: quen son eu?. É unha pregunta importante, xa que na resposta a ela comprenderemos o grado de intimidade e amizade que temos con El.

Para algunha xente Xesús é un personaxe histórico, para outra foi alguén que pasou facendo ben ou ensinando unha nova forma de vida, para outra é unha imaxe que adoran.

Quen é Xesús para nós?

Temos a oportunidade de encontrarnos con El nesta celebración e dicirlle o que realmente representa na nosa vida, e, como Amigos, compartir a súa mesa e sentir a súa proximidade.

Celebrante: *Xesús pídenos unha resposta, pero nós, moitas veces esquivamos a responsabilidade de ser as súas testemuñas cos nosos ditos e os nosos feitos, por iso hoxe pedimos perdón e comprometémonos:*

Monitor/a

- ✓ Comprometémonos con Xesús a vivir escoitando os seus consellos?

SÍ, COMPROMETÉMONOS

- ✓ Comprometémonos con Xesús a vivir facendo realidade os seus feitos?

SÍ, COMPROMETÉMONOS

- ✓ Comprometémonos a vivir sendo exemplo para os demais, testemuñando na vida de cada día o seguimento de Xesús?

SÍ, COMPROMETÉMONOS

Celebrante: *Deus Pai agarimoso ten piedade de nós, dos que teñen un lugar no noso corazón e na nosa vida. A todos, o Señor, nos concede o perdón e nos leva á vida eterna. Amén.*

ORACIÓN PROPIA DO DÍA

Celebrante: *Neste momento en que rematamos a primeira parte da celebración confiamos nas mans de Deus Pai a nosa oración e pedimos acercarnos máis a Xesús dando resposta coa nosa vida á súa chamada de amizade.*

(silenzo)

Celebrante:

Deus, Noso Pai, Ti, que es capaz de acordar as vontades dos teus fieis, concédenos, ao teu pobo, amar o que nos mandas e desexar o que nos prometes. Fai que, no medio dos cambios deste mundo, os nosos corazóns permanezan firmes alí onde se atopa a felicidade verdadeira.

Pedímoscho polo mesmo Xesucristo, noso Señor. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Xesús pregunta aos máis achegados que pensan eles sobre a súa persoa. Hoxe tamén quere preguntarnos a nós o mesmo.*

Que resposta temos neste momento a esta pregunta? Estamos dispostos, como Pedro, a responder con sinceridade e con feitos? Ou seguiremos sendo cómodos e deixaremos pasar a oportunidade de comprometermos con El?.

Leccionario I A páx 241 **Is 22,19-23**

LECTURA

LECTURA DO PROFETA ISAÍAS

Dille o Señor a Sobne responsable do templo:

Chimpareite do teu posto encumiado, botareite abaixo do teu pedestal. Sucederá no día aquel, que chamarei ao meu servo, Eliaquim, fillo de Hilquías.

Farei que vista a túa túnica, e fortalecereino co teu cinguidor e porei na súa man o teu posto de mando: será un pai para os habitantes de Xerusalén e para a casa de Xudá. Porei a chave da casa de David sobre o seu ombreiro: abrirá, e non haberá quen feche; e fechará, e non haberá quen abra. Cravarei a caravilla da súa tenda nun lugar seguro, e será trono de gloria para a casa de seu pai.

Palabra do Señor

♪ *Andarei na presenza do Señor* **SALMO**

(*en pé*) *Leccionario I A páx 243* **Mt 16,13-20 EVANXEO**

PROCLAMACIÓN DO SANTO EVANXEO SEGUNDO MATEO

Daquela, cando chegou á comarca de Cesarea de Filipo preguntoulles Xesús aos seus discípulos:

- Quen di a xente que é o Fillo do Home?

Eles responderon:

- Uns, que Xoán Bautista; outros, que Elías; outros, que Xeremías ou algún dos profetas.

Insistiu:

- E vós, quen dicides que son?

Respondeu Simón Pedro:

- Ti es o Mesías, o Fillo do Deus vivo.

E Xesús contestoulle:

- Ditoso ti, Simón, fillo de Xonás; porque iso non cho revelou ninguén de carne e sangue, senón meu Pai que está no ceo. E eu asegúroche que ti es Pedro, a pedra; e sobre esta pedra vou edificar a miña Igrexa; e as portas do Inferno non prevalecerán en contra dela. Dareiche as chaves do Reino dos Ceos: todo o que ates na terra, ficará atado nos ceos; e todo o que desates na terra, ficará desatado nos ceos.

E mandoulles ós discípulos que non dixesen nada de que el era o Mesías

Palabra do Señor

(**sentad@s**) gardamos uns instantes de silencio para acoller a palabra no corazón



Quen dis que é Xesús?

Elixes a túa resposta 



Solución: Todas as respostas son correctas

Cristo é un calquera:

É o pobre que non ten nada, o enfermo esquecido, o famento, a muller maltratada, o estranxeiro rexeitado en Ceuta, o refuxiado marxinado de Siria, o neno morto en Palestina, a vella esquecida e soa na aldea, a moza silenciada en Afganistán, a familia que o perdeu todo polo lume, o pobo que non ten auga suficiente, ...

Nós temos que ser e dar exemplo para ser cribles ao achegarnos a Cristo en cada unha destas vidas.

PROFESIÓN DA FE

Celebrante Neste encontro parroquial, deixándonos guiar pola luz da fe, queremos dar unha resposta clara á pregunta que hoxe nos fai Xesús no evanxeo e ser coherentes con ela:

 *Creo, Señor, pero aumenta a miña fe*

Monitor/a:

Credes en Deus, no Deus que é Pai e Nai, que nos creou á súa imaxe, e que nos ama, e que nos convida a camiñar dando razóns da nosa fe no vivir de cada día?

 *Creo, Señor, pero aumenta a miña fe*

Credes en Xesús, que quixo compartir a nosa vida, e que nos convida a ser cribles na paz dando resposta da nosa fe ante os demais?

 *Creo, Señor, pero aumenta a miña fe*

Credes no Espírito Santo, que enche de folgos o noso corazón para testemuñar con feitos de vida o evanxeo?

 *Creo, Señor, pero aumenta a miña fe*

Credes na igrexa, comunidade de fe, que comparte como familia facendo realidade o evanxeo na vida do día a día?

 *Creo, Señor, pero aumenta a miña fe*

ORACIÓN UNIVERSAL

Celebrante: *Movidos pola fe, hoxe queremos rezar polos homes e mulleres que non atopan respostas na súa vida, e facémolo dicindo:*

Señor, queremos terte como amigo

Monitor/a:

- ✓ Pedimos polas persoas que non atopan respostas na súa vida, que camiñan sen saber por onde nin cara onde se dirixen os seus pasos, oremos
- ✓ Pedimos polos gobernantes, para que non se deixen levar pola avaricia dos cartos, e non dubiden en loitar pola dignidade das persoas e dos pobos, oremos
- ✓ Pedimos pola Igrexa, para que no seu compromiso polas persoas, saiba poñer gañas de vivir en tantas situacións de dor, de depresión, de desalento, oremos
- ✓ Polas mulleres que sofren un trato penoso e denigrante como nos deixa a realidade da violencia de xénero, aínda que haxa quen a queira negar, oremos
- ✓ Polos amigos, os que de verdade nos coñecen, os que están á nosa beira nas alegrías e nas penas, oremos

Celebrante: *Grazas Señor porque sabemos que sempre acolles as nosas preocupacións e desexos se chos pedimos con fe a Ti que vives e reinas por sempre eternamente. Amén*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Xesús nin aparta, nin se aparta, ao contrario, achégase e no seu diálogo vaimos mostrando como medra en amizade. Que as palabras coas que agora rezamos sexan o signo da nosa amizade con El:*

NOSO PAI ...



SIGNO DA PAZ

Celebrante: *Non pode haber paz entre nós se fuximos do diálogo e do trato amistoso cos demais. Que na nosa vida esteamos sempre abertos á amizade e ao trato persoal para facernos transmisores de evanxeo para todos.*

Fagámolo agora compartindo un xesto de paz.

🎵 **nº 38** *Que medre a paz na nosa terra*

COMUÑÓN

Celebrante: *Xesús acóllenos hoxe a todos á súa mesa e preguntanos se de verdade somos os seus amigos e testemuñas.*

Ditosos nós que hoxe fomos chamados a dialogar con El e a comprometernos para facer realidade o seu Reino xa aquí. Ditosos nós convidados a este banquete do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **No colo da miña nai**

4.- AVISOS E DESPEDIDA

ORACIÓN FINAL

Celebrante:

Señor, leva á súa plenitude en nós a obra da túa misericordia.

Que o teu amor nos faga fortes e xenerosos para que che poidamos agradar en todo.

Grazas polo exemplo que nos dás en Xesús, o teu fillo benquerido, que vive e reina con nós por sempre eternamente. Amén.

Xesús espera a nosa resposta dando exemplo del nas palabras sinceras e acolledoras da nosa vida, e espera que deamos exemplo del nos feitos coherentes e responsables do noso camiñar.

Con Xesús queremos dar grazas pola vida sinxela das persoas que día a día nos amosan a amizade auténtica, como o puidemos compartir a semana pasada na festa de Os Cotos no merendeiro de Verducido.



- “E vós, quen dicides que son eu?”

Pregunta Xesús no evanxeo de hoxe.

Avísase das misas (ver folla do mes)

***Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén
Podémonos ir en paz. Deámoslle grazas a Deus***

🎵 **Ide e pregoade a nova de Deus**